

**Nuttarnerulersitsiniarluni tapiissutit pillugit Namminersornerullutik Oqartussat  
nalunaarutaat nr. 24, 25. august 2008-meersoq**

Suliffeqarnermi innersuussisarneq il.il. pillugit Inatsisartut peqqussutaat nr. 10, 18. december 2003-meersumi § 7, imm. 2 naapertorlugu aalajangersarneqarpoq:

*Nassuiaatit pillugit aalajangersakkat*

**§ 1.** Najukkatut angerlarsimaffigisatut paasineqassaaq Kalaallit Nunaanni illoqarfik nunaqarfilluunniit sulinermik inuussutissarsiuteqartup najugaqarfigisaa inuillu allattorsimaffianni nalunaarsorsimaffigisaa.

Imm. 2. Aappariittut katissimasutut inooqatigiinnertut naligiissinneqarput inooqatigiittut, 18-inik ukioqalereerneramik kingorna, ukiumi ataatsimi aappariittut inooqatigiittut peqatigiillutillu inuit allattorsimaffianni nalunaarsorneqarsimasut.

Imm. 3. Sulinermik inuussutissarsiuteqartutut paasineqassaaq suliffissaaleqisoq suliffeqarnermi innersuussisarfirmut nalunaarsimasoq atorfirmullu innersuunneqartumut sulisitsisumit atorfinitsinneqartoq, taamatullu sulisitsisup ilitersuussisussaataitaneranut malitassaqartinneqartoq.

*Atuuffik*

**§ 2.** Aningaasanut inatsimmi aningaasaliissutigineqartut iluanni nuttarnerulersitsiniarluni tapiissutinik aningaasaliissuteqartoqartarpoq sulinermik inuussutissarsiuteqartunut suliffimmik innersuunneqarnerminni isumaqatigiissut sulinermik inuussutissarsiuteqartunut pineqartunut atuuttoq naapertorlugu atorfininnermut angalanissamut pigisallu nuunneqarnissaannut akiliunneqarsinnaanngitsunut.

**§ 3.** Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik suliffeqarnermi kommunini innersuussisarfiit suliffinnik innersuussisarnerannut atatillugu atorfininnermut angalanissamut pigisallu nuunneqarnissaannut aningaasaliissuteqarsinnaavoq, tamatumani

- 1) sulinermik inuussutissarsiuteqartoq najukkatut angerlarsimaffigisami avataani suliffissamik innersuunneqarpat,
- 2) sulinermik inuussutissarsiuteqartoq ataavartumik atorfeqalernissaq siunniullugu atorfinitsinneqarpat, aamma
- 3) piffissami qaninnerusumi naatsorsuutigineqarsinnaanngippat suliffik najukkami sulisartunit najugaqartunit inuttalerneqarsinnaassasoq.

*Tapiissutit annertussusiat*

§ 4. Sulinermik inuussutissarsiuteqartumut, taamaattoqarpallu taassuma aapparisaanut qitornaasunullu 18-it inorlugit ukiulinnut angerlarsimaffimmilu sulij najugaqartunut atorfininnermut angalanissamut akiliuteqartoqassaaq. Atorfininnermut angalanissaq sapinngisamik ataatsimoorluni ingerlanneqassaaq najukkamut angerlarsimaffigiligassamut angallavissaq tamanit atorineqarsinnaasoq akikinnerpaaq atorlugu.

Imm. 2. Atorfininnermut angalanermi pineqarput bilitsinut aningaasartuutini tamakkiisumik akiliussineq.

Imm. 3. Angalariaaseq alla atorineqarpat taassumunnga aningaasartuutit uppersaasikkat matussuserneqassapput, taamaattoq angallavissamut tamanit atorineqarsinnaasumut akikinnerpaamut bilitsip akia qaangernagu.

§ 5. Pigisat nuunneqarnissaannut tapiissuteqartoqartarpoq imm. 2-miit 6-imut aalajangersakkat malillugit, taamatullu aamma maleruagassat tjenestemandinut atuuttut malillugit.

Imm. 2. Kisimiittut pigisaasa nuunneqarnissaannut tapiissuteqartoqartarpoq 15 m<sup>3</sup>-it nalingi angullugit. Imaatigut assartuinnermut assartuussinermullu nalinginnaasumik sillimmasiisoqartarpoq sillimmasiussat nalingi 182.500 kr.-nit angullugit.

Imm. 3. Aappariit pigisaasa nuunneqarnissaannut tapiissuteqartoqartarpoq 30 m<sup>3</sup>-it nalingi angullugit. Imaatigut assartuinnermut assartuussinermullu nalinginnaasumik sillimmasiisoqartarpoq sillimmasiussat nalingi 364.800 kr.-nit angullugit.

Imm. 4. Qitornarisamut ataatsimut pigisat nuunneqarnissaannut tapiissuteqartoqartarpoq ilassutit 5 m<sup>3</sup>-it angullugit. Imaatigut assartuinnermut assartuussinermullu nalinginnaasumik sillimmasiisoqartarpoq sillimmasiussat nalingi ilassutit 60.800 kr.-nit angullugit.

Imm. 5. Pigisat nuunneqarnissaannut ilaapput pigisat poortorneri, poortuutissat, assartorneri puuarneqarnerilu. Pigisat nuunneqarnerannut ilaangillat nussuinerit nalinginnaasut saniatigut pigisanik toqqorsivinniititsigallartarnerit.

Imm. 6. Pigisat nuunneqarnissaannut aningaasaliissuteqartoqareerpat pigisalli atorfininnermut angalanissamut attuumasumik umiarsuartigut assartorneqariaannaanngippata, tamanna pissusissamisoortumik uppersaasereerlugu, nassatat inummut ataatsimut 10 kiilut angullugit qaangerneqarsinnaanissaannut matussusiisoqarsinnaavoq.

#### *Aqutsineq aamma akiliuteqartarnej ilaalu ilanngullugit*

§ 6. Kommunit najukkani suliffissarsiuussisarfii Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfimmut qinnuteqaatinik nassiussissapput sulinermik inuussutissarsiuteqartup aamma sulisitsisup akornanni atorfininnermut isumaqatigiissuteqartoqaleriarpat.

Imm. 2. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik aalajangiissaaq nuttarnersitsiniarluni tapiissutinik aningaasaliisoqassanersoq. Aalajangiineq pissaaq najukkami, sulinermik inuussutissarsiuteqartup innersuunneqarfigisaani, sulisartunik piginnaasalinnik pisariaqartitsinermik ataatsimut naliliineq tunngavigalugu.

Imm. 3. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik qinnuteqarnissamut immersuiffilianik suliaqarsinnaavoq suliffissarsiuussisarfiit

nuttarnerulersitsiniarluni tapiissutitut aningaasaliissutinik qinnuteqartarnissaminnut atatillugu atugassaannik.

§ 7. Kommunini najukkani suliffissarsiuussisarfiit nuttarnerulersitsiniarluni tapiissutinik qinnuteqaatit sularinissaannut atasumik paasissutissat pisariaqartinneqartut tamaasa Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfimmut nalunaarutigisassavai, ilanngullugit paasissutissiissutigineqareersut pillugit allannguinerit.

§ 8. Kommunip sulinermik inuussutissarsiuteqartup najukkatut angerlarsimaffigisaata aningaasartuutit tapiissutitut aningaasaliissutigineqartut naapertorlugit akilertassavai.

Imm. 2. Kommunip aningaasartuutit Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfimmit utertitsissutigisassavai aningaasartuutit pineqartut aningaasaliissutigineqartut naapertorlugit atorineqareerpata.

§ 9. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfiup aalajangersinnaavaa nuttarnerulersitsiniarluni tapiissutit utertillugit akiliutigineqassat, tamatumani

- 1) sulinermik inuussutissarsiuteqartoq tapiissutit aningaasaliissutigineqarnissaannut sunniuteqartumik paasissutissanik eqqunngitsunik mianersuaalliorluni tunniussaqaarsimappat,
- 2) sulinermik inuussutissarsiuteqartoq tapiissutit aningaasaliissutigineqarnissaannut sunniuteqartumik paasissutissanik piaaraluni isertuussisimappat, imaluunniit
- 3) sulinermik inuussutissarsiuteqartoq nutaamik atorfinitsitaaffigisaminit atorfininnermi kingorna qaammatit arfinillit ingerlaneranni pisussaaffigisaminik sumiginnaasimanini pissutigalugu soraarsitaasimappat.

#### *Naammagittaalliuteqartarneq*

§ 10. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfiup matumani nalunaarut naapertorlugu aalajangiineri pillugit aqutsinikkut oqartussanut allanut naammagittaalliuutigineqarsinnaanngillat.

#### *Atuutilerfia*

§ 11. Nalunaarut atuutilerpoq ulloq 15. september 2008, atuutissallunilu nuttarnerulersitsiniarluni tapiissutit pillugit ullup taassuma kingorna qinnuteqaatinut.

Imm. 2. Matuma peqatigisaanik nuttarnerulersitsiniarluni aningaasaliissutit pillugit Namminersornerullutik Oqartussat Nalunaarutaat nr. 6, 15. marts 2008-meersoq atorunnaarpoq.

Namminersornerullutik Oqartussat, ulloq 25. august 2008

Siverth K. Heilmann

/

Bent Sørensen